

# INUIT ATAQATIGIIT

## Inatsisartuni



UKA2020/41-46-85  
17. november 2020  
Sofia Geisler

[UKA2020/41]

**Ilinniartitaaneq sorleq, assassornikkut atuagarsornikkullu Inuit Kulturitoqqarput pillugu ilinniartitsiviusinnaasutut piukkunnarnerullunilu ukkatarinnilluarnerusinnaanersoq pillugu Naalakkersuisut misissueqqullugit peqquneqarnissaannik inatsisartut aaliangiiffigisassaattut siunnersuut. Misissuinermittaqaq ersarissarneqassaaq ilinniareernerup kingorna, ingerlariaqqiffiusumik ilinniaqqinnissamut, suliffissaqarnikkullu periarfissat suusinnaaneri, nunanik allanik suleqateqarnikkut periarfissat, aningaasatigullu kingunerisinnaasai, iluaqutissat ajoqutissallu, kiisalu ilinniagaqarfimmut pioreersumut ilinniarfissap inissinneqarsinnaaneranut periarfissanut tunngasut ilanngullugit misissorneqassallutik. Misissuinerup inerneru kingusinnerpaamik UKA2021-mi Inatsisartunut agguanneqarsimassaaq.**

Inatsisartunut ilaasortaq Peter Olsen, Inuit Ataqatigiit

Peter Olsenip siunnersuuttaa piffissaagallartillugu iliuuseqarnermik malitseqartussaaq, tassalu kingornussasiat inuiaqatigiittut pigisatta tammatsaaliorneqarnissaat ineriartortinnissaallu siunertaralugu ataatsimoorfiusumik ilinniarfeqalernissaq Inuit Ataqatigiinniit taperserparput.

Naalagaaffiit Peqatigiit sila pillugu sulisitaasa [klimapanel] saqqummersitaanni tamani, ilaatigut september 2019 saqqummersumi, ersarilluinnartumik naqissuserneqarpoq silap kissatsikkiartupiloornerata naatsorsoruminaassiartuinnarneratalu issittumi najugallit inooriaasiat annertuumik sunnereeraa. Tassalu ukiut 1000-likkaat ingerlaneranni issittumi inooriaaseq atortutigullu ineriartortitsisimaneq ulorianartorsiortinneqartoq, kingornuttakkamik periuutsit atorneqartut naleqqussarneqarsimasullu tammarnernannik kinguneqarsinnaasumik.

Taamaattumik piffissaagallartillugu isumatusaartumik pilersaaruserluakkamillu tammatsaaliuinerup ingerlanissaa suliarisariaqarpoq, tamatumalu Naalakkersuisunit taperserneqarnera soorunami nuannaarutigalutigu siunnersuutip ataatsimiititaliamut susassaartumut ingerlaaqqinnissaa Inuit Ataqatigiinniit taperserparput.

[UKA2020/46]

**Inuusuttut 16-it 26-illu akornanni ukiullit sulilersut imaluunniit ilinniakkamik ingerlatsisut amerlisarneqarnissaat siunertaralugu immikkut iliuuseqarnissamut Naalakkersuisut 2026-ip tungaanut aningaasatigut allaffissornikkullu sinaakkutissanik ilaqartumik periusissiamik UPA-mi 2021-mi saqqummeeqqullugit Inatsisartut aalajangiiffigisassaattut siunnersuut.**

Inatsisartunut ilaasortaq Múte B. Egede, Inuit Ataqatigiit

2010-miit nalunaarsukkat takutippaat ukiut tamaasa inuusuttut 16-it 25-illu akornanni ukiullit ikinnerpaamik 2500-it missaanniittartut ilinniakkamik aallartitsisarsimangitsut suliffeqaratilluunniit. Inuusuttut taakkuupput inuiaqatigiit atorfissaqartitaat siunissatsinni sulisorilerumaakkagut, kivitseqataasussat. Taamaamat suliffeqarnermut ilinniagaqarnermulluunniit appakaatsinneqarnissaasa pingaaruteqassusaat apeqqusersussallugu takorloorsinnaangilarpulluunniit. Immikkut iliuuseqarnissarput pissaaffigaarput. Immikkullu iliuuseqarnissaq Múte B Egedep siunersuutaani qitiuvoq. Múte B Egedep siunnersuutaata Naalakkersuisunit itigartinneqarnera paasiuminaappoq. Tamannali uniffigiinnarnagu siunnersuuteqartup allannguutissatut siunnersuutaa innersuussutigissavarput,

allannguutissatullu siunnersuut akueralugu ataatsimiititaliamut susassaqtumut ingerlateqqinneqarnissaa Inuit Ataqatigiinniit innersuussutigivarput.

[UKA2020/85]

**Qanoq illoqarfinni nunaqarfinnilu suliffissaaleqiffiusuni qarasaasiakkut attaveqaatitigut assingusutigulluunniit inuusuttunut inersimasunullu misiligutitut pikkorissartitsinernik ilinniartitseqqinnernillu neqerooruteqarsinnaanermik pilersitsisoqarsinnaanera pillugu nassuiaammik kingusinnerpaamik UPA2022-mi saqqummiusseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.**

Inatsisartunut ilaasortaq Tillie Martinussen, Samarbejdspartiet

Imm. 46-imut oqaatigeriikkagut innersuussutigalugit Imm. 85-ip ataatsimiititaliamut ingerlatinneqarnissaa manna aqqutigalugu innersuussutigissavarput.